

## Yuav Pab Licas Koj Tus Menyuum Thiaj Kawm Tau Ntawv

Tsev kawm ntawv feem ntau qhia ntawv nyuaj zuj zus thiab xav kom lawv cov tub ntxhais kawm ntawv kawm kom tau zoo tshaj li yav tag los lawm xwb. Yog li ntawd, ua ntej koj tus menyuum yuav kawm tau ntawv zoo mas qhov tseem ceeb heev rau koj yog yuav tsum nkag siab zoo txog yam koj tus menyuum kawm thiab saib yuav kawm licas nws thiaj kawm tau. Qee koj lub sijhawm mentsis los pab qhia yuav ua rau nws txoj kev kawm ntawv tau zoo ntxiv tuaj.

1. **Nug koj tus menyuum seb nws kawm txog dabtsi tom tsev kawm ntawv txhua hnuv.** Tej zaum lo lus nug no yuav ua rau lawv tsis pom qab teb, ntau tus menyuum kuj yuav cia li teb hais tias "tsis muaj dabtsi" lossis "tsis kawm txog dabtsis ntau". Koj yuav tau nug mus kom tob zog, xws li koj yuav tau nug li no... "koj kawm tau zoo licas hauv koj chav Science hnuv no? Koj puas kawm tau qee yam tshiab?" Qhov lus nug no yuav ua rau koj tus menyuum piav qhia tau yam nws kawm ntawd rau koj. Nws kuj yuav qhia tau rau koj tus menyuum tias koj yeej txaus siab xav paub yam nws kawm seb yog dabtsi. Qhov no yog ib qho tseem ceeb pab qhia rau lawv paub tias tsev kawm ntawv tseem ceeb npaum licas thiab.
2. **Hais kom lawv ua lawv tej ntaub ntawv kom tag tso mam mus ua si.** Thaum menyuum zaum ua si "play games" lossis ua lwm yam uas nws nyiam lawm, ces nws txoj kev saib ntawv yuav nyob sab qhov rai nraum zoov lawm xwb. Hais kom nws ua thaum nws nyuam qhuav kawm ntawv los txog thiab thaum nws tseem nco thiab tseem muaj lub zog xav saib ntawv. Tamsim ntawd kiag lawv yeej yuav yws mentsis, tiamsis yog cia ntev lawm mam hais kom lawv los ua lawv tej ntawv mas tsis yooj yim kiag li lawm vim hais tias lawv lub siab twb tsis nyob ntawm lawv cov ntawv lawm. Zaum nrog lawv ua lawv cov ntawv. Qhov no yuav pab lawv ua tau lawv tej ntawv dua vim hais tias koj nrog lawv ua thiab.
3. **Npaj yam khoom uas yuav pab lawv ua lawv tej ntawv kom txhij tos lawv.** Npaj ntaub ntawv los sau lossis laij leb, npaj mem thiab lub tua ntawv kom txhij rau ntawm rooj. Li no, thiaj yuav tsis muaj kev cuam tshuam pheej sawv mus muab ub muab no lossis thiaj yuav tsis nkim sijhawm rau koj tus menyuum ua ntawv. Thiab tsis tas li ntawd xwb, koj tus menyuum thiaj ua tau nws cov ntawv yam tsis daig thiab nws thiaj li yuav nkag siab tias yuav tsum ua ntawv tag tso mam ua si.
4. **Hu nrog koj tus menyuum tus xibfwb tham seb nws kawm ntawv zoo licas nyob hauv chav kawm.** Tham qhia txog yam teeb meem kev txhoj puab uas koj pom muaj nyob tom vaj tom tsev seb puas zoo li ntawv nyob rau tom tsev kawm ntawv thiab. Nws yog ib qho tseem ceeb uas koj yuav tau ua tib zoo mloog kom tog txog tej uas tus xibfwb piav txog koj tus menyuum thaum nws nyob rau hauv tsev kawm ntawv. Tsis muaj ib tug niamtxiv twg uas xav hnov hais tias lawv tus menyuum kawm tsis tau ntawv thiab tsis mloog hais. Tiamsis, koj yuav tau qhib siab ua tib zoo mloog thiaj pab tau koj tus menyuum hla kom dhau qhov nyuaj thiab yuav ua rau nws rais mus ua ib tug menyuum kawm ntawv tau zoo.
5. **Nqi lus xaus, tiamsis kuj yuav tsis kawg li no thiab, qhuas koj tus menyuum txoj kev kawm tau zoo es txhob txhawj txog yam nws ua tsis tau.** Yog hais tias nws tau qhabnias tagrho yog "A" thiab "B" es ib-ob tug C xwb, qhia rau nws tias koj nrog nws zoo siab npaum licas rau cov qhabnias nws ua tau zoo ntawd tiamsis neb ob leeg yuav tau siv zog kom ua tus qhabnias qis ntawd nce tuaj. Qhia nws paub tias koj yeej nkag siab tias kawm ntawv yeej nyuaj thiab txawj nkees tiamsis koj yeej yuav nyob ntawd pab nws. Ua zoo piav rau nws tias koj yeej tsis txaus siab heev rau tus qhabnias qis ntawd thiab, tiamsis neb yeej yuav sib pab kom nws ua tau tus qhabnias ntawv nce tuaj. Thaum tus menyuum pom hais tias niamtxiv muaj kev nkag siab lawm, yuav pab qhib tus menyuum lub siab qhia niamtxiv txog yam nyuaj rau lawv tom tsev kawm ntawv tias yog dabtsi thiab yuav qhib tau kev sib nkag siab zoo rau thaum tus menyuum tiav hluas thiab mus rau yav laus.